



**Nuna tamakkerlugu Pinaveersaartitsinermit Siunnersuisoqatigiinnik pilersitsinissaq pillugu kingusinnerpaamik UPA2019-mi siunnersuummik saqqummiusseqqullugit Naalackersuisut peqquneqarnissaanik Inatsisartut aalajangiiffigisassaattut siunnersuut. Siunnersuisoqatigiit Naalackersuisunut, Inatsisartunut taamatullu kommunit siunnersuisartuussapput atulissallutillu najukkani pinaveersaartitsinermit ataatsimiititaliaq, Imigassaq aamma Ikiaroorartoq pillugit Siunnersuisoqatigit kiisalu immaqa Peqqinnissaqarfinni pinaveersaartitsisutut siunnersortitut atorfillit taarserlugit.**

(Inatsisartunut ilaasortaq Tillie Martinussen, Suleqatigiissitsisut)  
( Siullermeerneqarnera)

Siunnersuuteqartoq isumaqatigaarput oqarmat pinaveersaartitsineq pillugu nutaamik eqqarsartariaqalersugut.

Assersuut piviusoq aallaavigilara. Oqarasuaateqarpugut sianerfigineqarsinnaasumik inunnit imminut toqunnissaminnut eqqarsartunit imaluunniit immminut toqussimasumit kalluarneqarsimasunit, aapparissamit persuttarneqarsimasunit, kinguaassiutitigut kanngutsaattuliorfigineqarsimanertik pissutigalugu kingunerlutsitsisunit, ilaqutariinnut siunnersuisartunut sianersinnaavugut, oqasuaatinut sinersinaavugut assigiimmik siunertalinnut, tassa pinaveersaartitsinermit atatillugu suliniutinik nukittorsaanissamik.

Ajornartorsiutaaginnarpoq oqartussaaffiit assigiinngitsut ataatsimoorlutik suliniuteqartannginnerat. Kinami oqarpa imminut toqunnarluni eqqarsarnermut kinguaassiutitigut kanngutsaattuliorfigineqarsimaneq attuumassuteqanngitsoq? Kinami oqarpat angerlarsimaffimmi ajornartorsiornermut persuttaasarneq pissutaanngitsoq? Kinami oqarpa angerlarsimaffimmi persuttaasarneq kinguaassiutitigut kanngutsaattuliornermik kinguneqarsinnaanngitsoq?

Uanga isumaqarpunga suut tamarmik ataqatigiittut. Taamaattumik pisariaqartutut isigaara oqartussaaffiit eqiterneqassasut, ataatsimoorlutik pinaveersaartitsinermik pitsanngorsaaniassammata.

Ajornartorsiut alla ammasarfimmiippoq. Oqarasuaatikku siunnersuisarfiit tamarmik sapaatip akunnerata ingerlanerani assigiinngitsunik ammasarfeqarput aamma ullup unnuallu ingerlanerani. Siusinnerusukku oqarnittuut aamma oqaatiguassavara, ajornartorsiutit nalunaaqutaq malinneq ajorpaat. Oqartussaaffinnik eqiterineq tamanut iluaqutaassaaq aamma paasiuminarnerusumik pisoqalissaaq inuit ajornartorsiutaat immikkut normulersornagit kingornalu piffissani aalajangersimasuni nivinngarlugit.



Ukiuni arlalingortuni pilersaarutaanikuuvoq oqarasuaatit normuisa eqiternissaat, sulili taama pisoqanngilaq. Taamaattumik ilisarisinnaavarput pinaveersaartitsinermi isumassarsiat pivusunngortikkiartuaarnerat sivisuallaartarmat.

Isumaqarpunga inerniliissagutta isumalioqatigiisitalioqqaartariaqanngitsugut, takusinnaalluarparali Naalakkersuisut ataanni oqartussaaffiit kattukkaanni iluaqutissarsisoqarsinnaasoq, qularnaarumallugu ilinniarluarsimasunik sulisoqarnissaq aamma pinaveersaartitsinermi pitsaasumik tunngaveqarnissaq.

Takusinnaasakka naapertorlugit immikkoortuni arlalinni isumaqarluarpoq assigiinngitsunik ilinniagallit suleqatigiisinnissaat aamma isumasioqatigiisittarnissaat, taamaakkaluartorli isumaqarpunga ataatsimiititaliat, siunnersuisoqatigiit pinaveersaartitsinermilu siunnersortit assigiinngitsut, namminneq soqutiginnittariaqartut takusinnaagunikku iluaqutissarsivigisinnaallugu, taamaattumik siunnersuummi tusarusukkaluarpara nalaatsornerinnaanersoq siunnersuuteqartup taasakka tikkuarsimammagit.

Pinaveersaartitsineq pineqartillugu tamatta akisussaavugut, kinaagaluaruttaluunniit taamaattumik isumaqarpunga aamma nammineq piumassutsimik sulisartut qiviarnerusariaqarigut, kikkut tamarmik akisussaaqataallutik misigisimassappata, taamaaliortoqarpammi immikkoortumi nukiit pigisagut killeqaqisut atorluarneqarnerulissagaluarput.

Akornatsinniipput innuttaaqaterpassuagut akiussaaqataarusuttut aamma suleqataarusuttut inuttut ajornartorsiutit akiornissaannut. Ajornartorsiutaaginnarpoq periarfississimannginnatsigit. Tusarnaarusukkaanni inunnik isumaginninnermut siunnersoritit ilinniarsimasariaqanngilaq. Tarnip pissusaanut immikkut ilisimasalittut ilinniarsimasariaqanngilaq ikiuiniaaraanni. Amerlanerpaatigut inuit amingaatiinnartarpaat oqaloqatissaqarnissartik tusarnaarsinnaasumik, misilittakkanik avitseqateqarsinnaasumik ikiuutit

Aamma pinaveersaartitsinitsinni ingerlalluartut atorluarnerusariaqarpagut assersuutit. Inuit inuunerminni assigiinngitsunik qaangiisimasut inuit tarrasorfigisinnaasaat. Siullermik inuit tassaniissimasut ingerlaqqissimasulli neriulersittariaqarpagut. Pikkorinnerusariaqarpugut inuunitsinni iluatsitsisimanitta oqlauttuarinissaanut, inuunermi artornartunik aqquusaagaqarsimagaluaruttaluunniit.

Naalakkersuisut siunnersuummut akissuteqarnerminni oqarput pitsaaliuineq inuup nammineq inuiaqatigiillu suliassaraat. Tamanna isumaqatigilluinnarparput. Inuiaqatigiit peqqissusaannik misissuinermi ajoraluartumik aamma ersersinneqarpoq isumakkut peqqissuserput ajortumik sunnerneqarsimasoq. Tassani isumaqarpunga imminut ikiorsinnaaneq qissimittariaqaripput. Qanoruna iliorluta inuit nukittuut pilersissinnaagigut, ima nukittutigisut inuunerup atugassarititai suugarluarpataluunniit aningorluarsinnaallugit?

Inuk artornartorsiornermi qamani ilumini nukimmik nassaarsinnaasoq aamma inuunerminut akisussaaffeqartoq iluatsitsinikkut piffissaq artorsarfini qaangersinnaavaa pisortanit ikiorneqanngikkaluarluni. Tamanna aningaasartalersorneqarsinnaanngilaq pisortat



sipaartussangortinnerisigut, inuiaqatigiit immikkoortuni arlalitsigut iluaquserneqartussaammata taamatullu kinguaariit tulliisa pissusaat allangortussaammata.

Oqareernitsitut isumaqatigaarput pinaveersaartitsinermi nutaamik eqqarsartariaqaleratta siunnersuuteqartulli ataatsimiititaliat, aalajangiisartut siunnersuisoqatigiillu sorliit suleqatigiisinneqassanersut siunnersuutigereermagu, Naalackersuisut isumaqatigaagut oqarmata siunnersuut itigartinneqassasoq.

Naalackersuisulli kaammattorusuppagut uani saqqummiussami allaaserineqartut pinaveersaartitsinerup iluani isumassarsiat suliarinerat ingerlatiinnaqqullugu aamma Naalackersuisut kaammattorumavagut piaartumik pilersaarummik tamakkiisumik saqqummiusseqqullugit qanoq iliorluta pinaveersaartitsineq tamaat pitsangortissinnaaneripput pillugu.